

摘藻堂四庫全書薈要

集部

欽定四庫全書薈要

集部

仲弘集卷四至六

詳校官助教臣謝登雋



欽定四庫全書薈要卷一萬六千三百八十七

集部

仲弘集卷四

元 楊載 撰

壽姚承旨



黃金闕仙人白玉堂皇猷資黼黻大筆主文章間
氣生竒偉休期際吉康四朝承寵渥多士仰輝光盡發
琅函祕重繙石室藏成書侔二典有道述三皇碩望高
天下榮光近日傍謀謨須稷契羽翼藉園黃上殿扶鳩

杖開筵接蟻觴九重師道德千載合明良共說綸如綉
能催繡作棠人思興禮樂國待理陰陽舊族名先著高
門慶甚長賜書踰萬卷納笏過三牀轉覺勛庸盛還欣
體力強朱顏朝映日素髮曉欺霜已注長生錄曾傳却
老方宜齊周李耳遠邁漢張蒼松柏深逾秀芝蘭久益
芳願公多壽祉仍見子孫昌

贈周景遠學士

朔易回元氣人才起俊流聲華當翰苑文采冠中州振

佩趨臺閣抽毫侍冕旒人傳鸚鵡賦家有鸛鶴裘式觀
黷宮立共惟祀典修一朝虞或缺六器俾傍求俎豆俄
成列蘋蘩遂可羞中朝方有道下士實同休已及歸鴻
候姑為食蟹謀朋簪多繾綣使節少淹留曉日花間酒
春風柳下舟篇章微品藻山水媿清幽鄭璞曾先愿隋
珠不暗投考槃雖自引闕觀亦吾憂簡冊銷長日蓬蒿
憚凜秋論高非縱誕興遠託賡酬尚憶駒千里胡能貉
一丘何當把君袂相逐馭風遊

壽杜尊師

淡蕩風雲氣沈雄虎豹姿繇來天下士絕異里中兒
苦縣常栽李商山舊采芝不當卿相位猶可帝王師
始有巾車獲俄蒙仄席知賢才方竝用讒說遽相欺
豸角將巍冠龍鱗敢逆批變通俱合道舒卷各乘時
築室烟霞祕還丹日月遲願公長住世須作後天期

次韻曹士開毗陵喜雨

下土方淫滂高田獨旱乾木形憂隕命藿肉愧為官
索

冥雲容合蕭條夜色闌精誠天已感祠禱力初殫迫野
霑新潤曾檐下急湍槁苗還蕤蕤大豆且團團達宦俱
相似疲民乞少安佳章宜刻石留示後人看

春雪次陳元之韻

寒氣何淒慘春空正杳冥東皇收橐籥北帝駕軫輶混
沌包三極續紛走百靈散珠分的皪擊玉碎瓏玲始試
朝藏日俄疑晝隕星危橋無客渡曠野少人經百沸疑
奔瀨孤撐沒峻岭林荒顛凍雀崖滑墮哀挺袞袞隨風

舞颺颺襟雨零遺蹤初得免匿種詎憂螟眴睽傾農室
歌謠徹帝庭陽春將布德品類各成形捉筆題新句持
盃酌舊醺今朝須痛飲醉卧不須醒

送張仲實之宜興

南渡邦初造西山將獨賢立功何赫赫流慶尚綿綿報
國橫戈數登壇授鉞專風雲方際會江海固周旋控險
千鈞弩臨危七寶鞭忠誠深足仗智勇實兼全自返高
橋役端持宥府權兵威終抗敵人力可回天甲第無踰

者諸孫固穎然初生同燕領有美自嬋娟善學聞當代
能詩起妙年衛公猶故物鄭老竟寒羶矯矯青雲器冷
泠白雪弦同遊雖未達自覲已無前政事兼留意時髦
孰比肩知機無轉石縱辨若奔川持達羣公薦酸寒衆
目憐姑為文學掾會覓孝廉船必見公侯復無論雨露
偏秋風鵬鷃健萬里正翩翩

送丘子正之海鹽州教授

有美區中彥由來志不羣舟航了吳越裘馬向燕雲才

思庾開府風流王右軍得時宜玉筍稽古賸香芸果拔
英毛穎遄收翰墨勛諸公希宦達半世有辛勤奔走空
皮骨躋攀不寸分夏侯何地芥郢匠實風斤嗟我慚鵠
鷺棲山似鹿麕偶來詢故老因得友多聞湖舫曾秋雨
河橋幾夕曛過從方不散慘別亦奚云俎豆班侯泮鹽
絺薄海濱未論虞廩米聊樂魯宮芹此日顏應抗之人
德已薰化爐新鼓樂學殖重耜耘行矣穿黃落歸歟守
白紛贈言將底事努力在斯文

贈班彥功

名書稱晉代盛事起江東內翰鍾奇氣深情縱古風
樞衣皆弟子入室自豪雄欲立千金價寧論百日功
奏名黃閣老承詔大明宮遺教規王氏陰符易褚公
杯沾銀鑿落佩還玉玲瓏文學談經早聲華脫穎同
麥光人共賞棘刺巧無窮願積臨池趣流傳史冊中

士開燕岳氏溪堂有溪山新月上江海故人同之
句邀予及張仲實曹克明同足成之

置酒秋風裏，凭闌野色中。溪山新月上，江海故人同。縱
浪情何極，留連燕未終。三鱸來上客，五馬會羣公。積水
輸清氣，微霞衍近空。將昏林尚白，及早稻先紅。極論追
遐古，深情念困窮。尚觀儀秩秩，未遂樂融融。才著當朝
傑，文誇命世雄。數君今日選，宜爾集南宮。

次韻黃子久喜晴三十韻呈汪知府

霞彩晨張錦，蟾光夕挂鉤。陰霾雖盡解，淫潦豈全收。寢
動遨遊興，還聞倡和謳。容容追舊賞，歷歷破新愁。騎氣

城邊縱龍光海際浮艷粧來士女盛服擬王侯在藻羣
魚躍依林白鳥啾河流交不斷山勢轉相繆物理歸含
毓人情釋怨尤娛從老稚燕樂逐朋儔幄帟分郊次
幃帷擁道周聯翩馳畫舫截業累朱樓貿易通遐壤繁
華壓大州聚廬千井富接棟萬家稠已戒增周口仍催
泆下流嘉蔬連隙地宿麥徧高丘曹事虞多廢胥徒戢
過求醲恩方竝育和氣與同遊期會朝先往追隨暮不
休露華開的的風葉振颼颼拾芥非無日登禾即有秋

朝家期少試隣郡固難侔共美光華著還矜德業修在
廷爭進薦當宁免垂憂玉漏傳臺角金樽出殿頭秉心
存正道造膝待嘉謀履直恒如天防偏或類舟第誇緇
竹簡不省計牙籌善對慙鳴鶴能歌愧飯牛過情蒙許
與彌月為淹留

再用韻贈黃子久

自惟明似鏡何用曲如鈞未獲唐臣薦徒遭漢吏收悠
然安性命復此縱歌謳石父能無辱虞卿即有愁歸田

終寂寂行世且浮浮不假儕羣彥真堪客五侯高人求
比洽末俗避喧啾藜杖常他適繩樞每自繆與人殊用
舍在已寡愆尤濟濟違班列俛俛遠匹儔能詩齊杜甫
分道偪莊周達飲千鍾酒高登百尺樓艱危仍蜀道留
滯復荊州鶴度烟霄闊龍吟霧雨稠東行觀海島西逝
涉江流自擬需于血何期渙有丘古書嘗歷覽大藥豈
難求撫事吟梁父馳田賦遠遊堂名希莫莫亭扁效休
休檻日迎東霽窗風背北颼鳴琴消永晝吹律效清秋

雅俗居然別仙凡迥不侔多聞踰束皙善對邁楊修進
有匡時畧寧無切已憂塵埃深滅跡霜雪暗盈頭始見
神龜夢終營狡兔謀雪埋東郭履月滿太湖舟急景誰
推轂流年孰唱籌凌波乘赤鯉望氣候青牛好結飛霞
佩胡為淹此留

寄王繼學二十韻

聖主敷皇極元臣建上台虛心求俊乂削迹去奸回拜
命超凡品知君秉大材淳風隨日播公道應時開負鼎

資烹飪搯刀貴剗裁鋤鋒行肯蔡異味合鹽梅廟議常
叅決朝班復共陪艱難須飲助豁達遠嫌猜遺佚聞風
起英豪接踵來經綸非董賈辭藻亦鄒枚在野思羅致
盈庭想轂推既將龍作友惡假鴿為媒走也今留此公
乎可念哉執竿猶海上扶耒即巖隈自守幽人意寧虞
俗子咄舊遊辭玉府故事憶金臺落魄江湖阻蒼茫歲
月催丹心徒耿介素髮已毵毵勿謂交如水能忘恥及
壘飛黃當駕馭猶足異駑駘

送旺扎勒圖同知

來游天子學藉甚有聲華論事依三策藏書至五車姓
名題雁塔譜牒記龍沙自可編青竹兼宜綰白麻文工
金有價貌美玉無瑕興盡方豪飲篇終不浪誇豈惟吟
芍藥曾是賦蒹葭事莫分難易人須辨正邪月中初折
桂天上始乘槎勿待秋風起宮門聽鼓撾

贈郭集賢

衣冠趨近地藻翰集羣賢給事黃門裏抽毫黼座前佩

龜金作紐賜馬玉為鞭御酒傾壺滿宮花插帽偏清光
依日月逸思繞風烟記憶踰三籟吟哦過百篇自惟叨
侍從不敢廢周旋秋著隨車獵寒當襦被眠蘇環才既
敏陸贄寵尤專自爾紆皇眷於焉理化弦詞臣方進用
才大畢騰騫可念如揚子蕭蕭獨草玄

悠然閣

高閣凭虛起登臨興甚長江流春渺渺樹色曉蒼蒼原
隰魚鱗布峯巒鳥翼張雲來兼北極雨過及南荒地大

遺民富時清致理康南山常在望懷古意難忘

寄周御史二十韻

同游河北後共抵浙西初獨倚知心舊翻成會面疎三
年仍契濶萬里更吹噓小子無奇氣先生有過譽見稱
司馬賦求授夏侯書倉卒排歸計淹留著寓居已非興
俊逸猶異主癰疽名士多親我諸公或請予駕言將采
芑即事欲連茹顧爾傷流矢居然恨倚閭驚心聞杜宇
過眼易蟾蜍忽召抽金匱俄徵論石渠文章殊賈馬謀

略匪嚴徐薄技終難效窮愁只自如尚矜存弊履不肯
曳長裾與作棲梁燕寧為呼轍魚儀形長日想懷抱幾
時攄奏疏聞當宁抽毫待直爐烏臺弦既改鰲禁席仍
虛馬首何繇見分光興有餘

送董與可為句容縣主簿

主簿非高士通才或暫為催科虞慘急勾校慮稽遲慎
察文無害詳觀獄有疑溫純規白璧正直視朱絲要使
聲名著何嫌品秩卑烏臺懸日月舉辟實無私

送未復之為邵武教授

放浪來京國于今復幾年山川多歷覽日月屢推遷異
俗疑烏帽窮途信馬鞭達官空有榻遊士固無氊始聽
除書下俄聞抗旆還南州分教地成法紹前賢

趙彥祥母慶八十

從親年八十萬里自西來氏族稱三蜀光華照二臺
奈繁愁夜雨筍長望春雷綺食和金鼎香醪進玉盃
鳳毛方煒燁鶴髮正皤皤試使蟠桃熟從今更幾回

雲山圖為茅山劉宗師作

長江千萬里奔浪薄高雲龍現誰能覩猿啼不可聞迂
迴因地勢昭晰應天文劒氣秋如洗珠光夜欲焚連峰
俄筍迸斷岸復瓜分句曲臨東極巖頭有隱君

題喀爾氏家譜

國受輿圖廣家傳譜牒詳馳聲繇雁塞拓跡至狼荒轉
戰踰千里來降盡一方奮戈回白日列戟耀清霜破竹
收城邑分茅賜土疆弟兄皆勁悍父祖各雄彊相印仍

兼綰兵符更迭藏排衙開萬弩納笏過三牀已及書宗
祏還宜紀太常後人能繼紹千載有輝光

題王叅政積翁別故人詩卷後

聖主膺新命明公遇盛時混同開宇縣困厄守城池寇
盜思攘敗黔黎賴寵綏合珪承燕享前席備詢咨築室
求梁棟祖堂薦鼎鼐用兵陳廟筭養士作邦基已草歸
田賦仍題伐木詩此生終契濶吾道豈磷緇矯矯游龍
宇綿綿吐鳳辭錦囊加什襲細覽想形儀

贈魏虛舟少府

西蜀文章伯東吳閥閥家
族傳貞觀舊躅繼信陵遐雅
度人難測高名衆共誇
為植材不小韞櫝玉無瑕
鳴鳳占諧吉乘龍偶契嘉
三牀邀納笏萬弩護排衙
世賞官仍及朝叅寵復加
天顏垂眷顧地肺侈光華
緩步方鳴玉高情欲泛槎
翻然歸翠麓姑爾奉黃麻
彭澤還栽柳河陽不種花
投閒銷日月訪古略烟霞
臘蟻常開宴春魚每省義
興來恒放逸賓從任喧譁
閤靜褰珠箔窗虛

閔綠紗琴彈多古雅詩就輒妍媸願作梁間燕徒慙井
底蛙執鞭曾莫効抱瑟敢長嗟戀戀情終在悠悠道若
賒春風吹去旆翹首又天涯

贈劉平叔郎中

肇自三苗氏淫為五虐刑商周終至治禮樂固常經赦
過存三宥原情用八聽未能還畫象猶貴去殘形末俗
仍澆薄生民曷救寧謂宜沾雨露抑使震雷霆皞皞惟
毋擾元元庶有靈林殘求虎豹穀害去蝗螟此意雖忠

厚斯言若實冥君乎吾有望當使在朝廷

送丘子正之海鹽

珠生滄海底玉韞碧山中夜氣交明月陽精現白虹有
賢兼重價當代振英風好學由天性能書至國工知名
傳冀北作賦擬河東始欲徵揚子旋聞薦褚公陰符難
獨美遺教實爭雄絕藝雖宜進奇才自不同交游傾上
國掄選屬南宮鄧禹官初試匡衡對漫通海邦終寂寞
學館尚穹崇已注千人錄當成五典功星辰皆在水渤

澌信浮空把酒歡何限乘槎興不窮文章趨浩瀚物態
入牢籠子必登芸閣吾方守桂叢索居彌寡陋荒業孰
磨礱弗獲披雲霧惟思對華嵩知音期郭泰流俗易王
充江海從茲逝飄飄任短蓬

贈虞彥高

吳越知名士風流得此人結交何待久晤語即相親丹
穴生儀鳳滄波豈縱鱗飛鳴常見瑞變化不無神家世
皆為善文儒謹飭身不將紉袴累自著彩衣新力學追

高古修辭絕等倫
汪茫涵巨海杳渺動纖塵
鐘簴聲音大韻輕
節奏均詎誇傳里巷
可使抒絲綸藉藉聞當代
駸駸集要津
省闈曾奉檄學館已垂紳
滋味嘗郊鼎光華薦席珍
南宮延國子西掖選詞臣
慷慨升車日遲回執袂辰
論心情已至抵掌氣彌振
虞詡才方壯湯休學最醇
相期終晚歲無取艷芳春
抱獨知何向為朋喜有因
從君鳴一世流詠被無垠

鄭中丞母太夫人壽八十

端公居重位壽母在高堂天意何相厚人倫實有光
冠方俊偉鶴髮尚康彊內翰為封誥同僚舉慶觴欣
承玉饌赫赫帶金章獻笑慈親側繩愆聖主傍中天懸
日月下土凜風霜可謂全忠孝都緣積義方孟軻獨
美湛氏竟齊芳頌德吾無愧名宜百世揚

送朱仲山歲貢入京

昭代陶淳化多方出異材鳴岐閭鳳鳥清道服龍媒養
素稠山僻觀奇載籍該為珍如寶璧奮蹟起蒿萊未展

垂綸趣初承勸駕催羔羊填委巷駟馬踐輕埃戰藝鋒
無敵搜賢網正恢上書追偃樂作賦竝鄒枚奮發真從
此遊觀亦壯哉雲霄千萬里瞻望重徘徊

招真觀圖

欲學無為道來居小有天精神消物怪米色變風烟恬
澹知天德虛無象帝先高風何特達古跡尚流傳地涉
鴻荒表山開混沌前谷幽疑鬼聚峰巧類人公疊起三
重閣分流百道泉岩穿留虎跡石冷逗蛟涎放浪曾無

日遨遊未有年古經披覽罷毛骨為醒然

喜晴得揚字呈汪知府

霏霏寒宿靄煜煜射初陽出谷鶯聲滑摩空鶴勢張鼓
輦爭奮發帆幔各飛揚不畏塗泥滑寧憂積潦妨農夫
分舊種紅女覓柔桑為有豐年慶陳陳滿太倉

寄沈少微金華山隱居

巖前通細路嶺外接危峰梯磴踰千級烟霞過萬重綠
崖收異卉步壑數長松隔屋號朱虎當窗現黑龍蘅蘭

爭酷烈桃李角鮮穠隱士多相過仙人庶可逢第能安
性命何患改顏容煉鼎丹砂熟傾壺白酒釀微茫追絕
響瀟灑振孤踪鄉里宜同好它年必子從

輓徐處士

此日新安郡名家復數誰危科雖屢掇舊業詎多遺孝
友全高行溫恭集令儀花殘青歲晚木落紫山悲結蟻
容兼盛銜鱸譽更垂白雲埋骨處揮涕想連而

送侯尊師歸蜀

北上關河遠南歸歲月賒飄飄攜短劍杳杳泛靈槎別
岸秋濤掩前山曉霧遮欲攀青桂樹先採白蘋花大道
元無極浮生即有涯舉杯吞夜月引袖拂晨霞獨跨冲
天鶴能追赴壑蛇祇因投老去長日煉丹砂

春晚喜晴

積雨俄經月新晴始見春蒼苔侵別墅綠水過比隣性
僻居宜遠身閒景易親無詩排世累有酒縱天真循圃
花粘履凭闌柳拂巾歌呼從稚子談笑或嘉賓漸喜漁

樵狎仍欣鳥雀馴幽情延薄莫浩思集清晨養拙元非
病為文敢自珍杜門緣底事作計懶隨人

仲弘集卷四

欽定四庫全書薈要卷一萬六千三百八十八

集部

仲弘集卷五

元 楊載 撰

次韻虞彥高遊陽明洞

憶昔神禹奠九州茲山會計功始休諸侯玉帛渺何許
但見萬水從東流衣冠永閉陽明洞夜聞鬼哭巖之幽
珠宮貝闕號龍瑞天造地設非人謀槎牙怪樹凍不死
化作千丈蒼玉虬丹洞呀然仙掌裂翠峰巧矣蛾眉修

梅梁飛去鐵鎖斷往往雷雨生靈湫軒輳緹神極秘怪
海上笙鶴時相投平生閉門讀史謳子乃探穴先吾游
明當挾子期汗漫題詩更在最上頭不妨山水樂吾樂
豈有飢溺憂民憂故家喬木尚可求有子有孫百世留
卧橫玉簫泛歸舟吹散萬斛江南愁

送俞用中之蓮城

君家文獻猶未泯名載舟車無不之乃翁種德不食報
流慶涓涓方在茲皦然玉立七尺軀相非公卿無此奇

早孤為學孰勉劬藏書萬卷能盡披李父撫育過已子
將為前人護址基我兄長公有年歲才氣偉燦通時宜
賈誼晁錯奉大對生晚弗及同驅馳君今沿檄治鄉校
初官履歷固不卑要為國中養賢俊政無大小視所施
括蒼山好著仙籍昔人於此自燕頤榮公相業輩王謝
石僧尚有踪跡遺君居三載業可想再見惟有操降旗

古牆行

建炎白馬南渡時循王以身任安危殊恩治第壯輿衛

縮板栽榦繇偏裨下鋪江城但沙鹵往夷赤山取焦土
帳前親兵力如虎一日連雲興百堵引錐試之鐵石堅
長城在此勢屹然上功幕府分金錢謹聲如雷動地傳
爾來瞬息逾百年高崖為谷驚推遷華堂寂寞散文礎
喬木慘淡棲寒烟我入荒園訪遺古所見惟存丈尋許
廢壞終嗟麋鹿游飄零不記商羊舞王孫欲言淚如雨
為言王孫母自苦子孫再世隳門戶英公尚及觀房杜
如君百不一二數人生富貴當自取況有長才文且武

公侯之後必復初好把家聲繼其祖

題山石猿鳥圖

萬卷堆中昏欲睡忽見畫圖醒我意眼前崖谷起嵯峨
便似著身遊此地梗枿櫛櫟大百圍奔泉透石霹靂飛
玄猿孤峙憩美蔭下視白鳥娛清暉昔聞虞舜狩南嶽
君子相隨化猿鶴往時此輩猶爾為慨想雲林真可樂
拔劍斫山山骨露山鬼呶嚶安敢怒祇今踴躍歸去來
莫愁無覓誅茅處

李伯時畫浴馬圖

古稱難畫莫如馬近朝唯數李伯時不至天閑觀帝服
如此骨相何由知頭類渴烏尖挿耳竟度流沙輕萬里
圉人牽浴恒凜然復恐化龍奔入水貧居里巷無馬騎
徒步出入多傷悲大脰薄蹄何足願退立道傍塵滿面

送時中兄入京

先生意氣非常流有如鷗鷺厲九秋讀書不肯守章句
經濟可許斯人儔懷抱利器將遠遊直往上國交公侯

公侯位高不下士如以蛟龍視螻蟻為君莫敏光範書
以氣撼搖差可耳功名倘來不足為丈夫須作遠大期
君不見麒麟閣上圖英俊當時或自閭閻

有關文

次韻題慈照寺浪紋石

山前流水響急灘崖崿齟齬嶮且艱直上正平稍去水
坡陀漫漫龍背起幽阻之間有奇石洵若北風吹海立
滄海飛塵事有徵遂使喧阗化冥寂開闢以來六萬四
千歲浩浩洋洋不休息雖有好事者欲為之不似大造

無痕迹我行見之頗愕然抽觴戲欲取涓滴僧堂託宿
語不眠竟莫禮了生公禪意外奇崛當眼前跋涉無負
兩足跣君家住時宅通鄆何如金堂石室友羣仙會見
石髓流為泉何事更種東臯田予能食之可長年

題王起宗畫松岩圖

雲起重岩鬱凌亂長松落落樹直榦若人於此結茅屋
爽氣飄然拂霄漢艤舟之子何逍遙從者偃僂攜一瓢
山中無日不閒暇跋涉相顧凌風颭始知王宰用意高

使人觀圖鄙吝消世間未必有此景塗抹變幻憑秋毫
丹青遊戲故足樂收絕視聽搜冥冥向來為政殊不惡
乃爾胸中有丘壑

題華岳江城圖

華岳能詩世有名學畫丹青亦豪放此圖似寫安慶城
雉堞樓臺儼相向北風將至江面黑千艘萬艘爭避匿
滄溟涌溢水倒流南嶽動搖天柱側蛟龍戲落秋潭底
素練平鋪八千里時清好作釣魚翁閒弄輕舟烟霧裏

神馬歌次韻陳元之

卷五

神馬來自崑崙西有足未始行沙泥朝趨欲出飛鳥上
夕逝直與奔星齊綠鬃半散插雙耳赤汗交流攢四蹄
風神秀猛陞天地豈顧燕蔡并渠黎時時牽浴臨清溪
對人誇殺黃須奚玉沙之禾中芻秣不嚙提頭枯草稊
與君側耳聽長嘶凡馬不聞生缺驪

古劍歌為吳真人作

閒閒真人藏古劍敬之如神不敢忽賓客時來求一觀

輒有悲風起倉卒人言此是金鐵精良工煅煉久始成
動搖天地合變化摩蕩日月含光精昔年有蛟起江中
口吐烈焰燒長空下民昏溺上帝怒雷電往擊皆無功
嘗持此劍斬蛟首流血滔滔浸廬阜傳記傳聞時既久
不意世間今尚有吾過下里多惡氛魍魎魍魎能食人
請君為我絕此怪一洗宇宙長清新

梅梁歌酬鄭集之

大禹之功及天地廟有梅梁何足異奈何過用鐵索纏

太祝為之欲微利每言變化失其所去作老龍治風雨
一聲霹靂震岩扉千尺蜿蜒辭殿戶七月槁苗沾塊土
憂殺村中老農父買羊沽酒祭梅梁祭罷祠官傳好語
吁嗟老農無爾愚大禹有神焉可誣汝曹淫祀欲求福
此物為妖當伏誅

題趙千里山水扇面歌

公子丹青藝絕倫喜畫江山上紈扇祇今好事購千金
四幅相連成一卷春流漠漠如江湖飛烟著樹相有無

嵐光注射翻長虛白玉盤侵青珊瑚追隨流俗轉蕭疎
對此便欲山林居旗亭花發酒須沽舟行為致雙提壺
抱琴之子來相須醉歸不省何人扶旁有飛泉出岩隙
掣電飛霜相盪激蛟龍不愛鯢桓食但見垂綸古盤石
人生萬事無根柢出處行藏須早計一丘一壑倘如斯
便可束書從此逝君不見鄭子真躬耕谷口垂千春毫
芒世利能沒身汝胡齷齪為庸人

題秋雨長吟圖

雨暗秋天黑如墨窮居茅屋出不得終日長吟復短吟
吟罷令人轉悽惻飢猿抱樹屈雙肘病鶴拖泥垂兩翼
何當策杖過溪頭要看南山新翠色

竹樹圖

荊棘蒙籠迷竹樹亂堆古石蒼苔護縱獵青郊懷舊路
躍馬重岡追狡兔箭翎落地無尋處

時中兄示余畫一軸畫一老翁推獨輪小車上載
兩巨甕意其為警世之為因為賦詩

小人無他獨嗜利兩甕載車將遠致肩頰足趺汗潛然
冉冉修程胡不畏世人但笑愚翁愚甕破即與瓦礫俱
不知人有千金軀前行險道方乘車

仲弘集卷五

欽定四庫全書薈要卷一萬六千三百八十九

集部

仲弘集卷六

元 楊載 撰

宗陽宮望月分韻得聲字

老君臺上涼如水坐看冰輪轉二更大地山河微有影
九天風露寂無聲蛟龍竝起承金榜鸞鳳雙飛載玉笙
不信弱流三萬里此身今夕到蓬瀛

次韻錢唐懷古

四首

江湖清濁自天開鴻鴈鳬鷺與往來黃道星辰環太乙
紫雲宮殿擁蓬萊論文競奏王褒頌獻壽深傾阿母盃
九域輿圖今混一百年耆舊獨興哀

又

斜界鈎陳通道中分魏闕對層巒雲生殿上金爐暗
露下庭前玉井寒江漢飛龍俄窅窅滄溟泛鷁竟漫漫
中天會合寧非數坐見蒼生奠枕安

又

山回禁籞入雲長無復陳兵衛兩廂
千石金鐘埋野草萬年珠樹落秋霜
龍文不徙陽人聚鳥篆終降軹道傍
九市塵埃來袞袞一江波浪去茫茫

又

化人宮闕被層阿棟宇高低若湧波
翠石文章書日月寶珠光燄燭山河
空桑說法黃龍聽貝葉繡經白馬駝
誰謂一無超衆有只今塵土重來過

題豐樂樓

崢嶸飛構壓名邦西望平湖東望江氣合重玄蒙沆瀣
標存九域奠洪龐朝來散霧縈朱拱夜後流星透碧窓
倚徧闌干愁目眩飛鳶旋轉故雙雙

水樂洞

石林求路轉聳牙來訪香巖大士家雨過門前生薤葉
風行隴上落松花懸崖滴水鳴金磬激澗流泉走玉砂
欲適山林去城市久知寂寞勝紛華

題拱北樓

殷地鼓輦迎日出倚天梁棟與雲浮北瞻帝闕三千里
南控臣藩二百州江海無波沉罔象旌旗垂野駐貔貅
鸞迴麗榜多深意繡袞于今有魏牟

次韻羅雲叔紅梅

玉人中酒殢芳華盡壓東風百種花
襍被冬深栽異錦
篝燈夜永障輕紗
纖蕤露沁蜂腰蠟
密蕊雲蒸鶴頂砂
爲問閭風何處在
相期高舉籥晨霞

紀夢

海上垂綸有幾年平居何事夢朝天蒼龍觀闕東風裏
黃道星辰北斗邊治世祇今逢五百前程如此隔三千
揚雄解奏甘泉賦應有聲名達帝前

次韻陳子仁黃河二首

禹功疏鑿過憂勤海內山川自此分元氣渾淪通地脉
孤光迢遞貫天文母金伏礫秋逾盛陰火藏淵夜不焚
多少魚龍爭變化總歸西北會風雲

又

陰陽爲沴黃河溢北度艱難擁萬艘齊楚百城防雉堞
淮沂千里避鴻濤耕鋤已失天時正流徙爭依地勢高
此日朝廷憂水患須明利害策賢豪

遊水樂洞分韻得人字

常聞勝地宅仙人如此淵泉必有神子晉重來玄鶴舞
琴高初化赤魚馴巖排利劍鉤鐔古水象鳴球節奏均
更有山僧能解語自今休厭往來頻

望海

海門東望浩漫漫風颺無時縱惡湍黑霧漲天陰氣盛
滄波銜日曉光寒豈無方士求靈藥亦有幽人把釣竿
搖蕩星槎如可馭別離塵土亦何難

送羅雲叔歸山中

黃石山原風物幽賤子往年曾一遊舊行櫟柘已成逕
新藝禾麻應滿疇馮衍能忘白首嘆謝安須爲蒼生憂
餘杭溪上明日發愁殺楊花吹客舟

送段時敏之京

懷山挾海奠京師氣執紆餘盡北陸鴈度塞雲秋色遠
鵲鳴宮樹曉光遲四方英俊皆來萃一代經綸屬有爲
君具長才希屈賈好將詞賦重當時

留別京師

囊衣託載道傍車人事匆匆歲欲徂風雨四更雞亂叫
關河千里鴈相呼蕪菁散漫根猶美桑柘蕭條葉漸枯
卻向高丘重回首五雲繚繞帝王都

東溲東萬戶蕭伯善

擇帥中軍自古難獨分符節守藩翰夜鳴鼓角溪山靜
曉豎旌旗雨雪乾不待掃門知魏勃豈須彈鋏識馮驩
祇令四海無征戰萬卷詩書好厭觀

送勾曲外史張君歸華陽

送君高舉入華陽古洞深蟠石路荒蔽日旌幢朝旋旋
飛空環佩夜琅琅餐霞已試登仙訣祀竈還修却老方
見說陶公雖隱遁猶將道德佐齊梁

送戶部喀爾尚書二首

經濟才高負重名
早趨蘭省執權衡
唐除宰相同三品
漢拜司農列九卿
禮樂正圖興美化
錐刀先務已苛征
公家事業齊周召
重使斯民望太平

又

屢挾囊書上國遊
途窮獨擁弊貂裘
驟蒙陸贄知韓愈
直待常何薦馬周
北上塵埃憐寂寞
南遊歲月苦淹留
鰥生資歷猶卑淺
可使徘徊製錦不

贈同院諸公

詔編國史有程期正是諸郎倬直時虎士守門宮杳杳
雞人傳箭漏遲遲窓間夜雨銷銀燭城上春雲壓彩旗
才大各稱天下選書成當繼古人爲

玉堂夜直

直廬歲晏動羈情朔雪將飛覺夜明金井輓轡哀響絕
玉階瓊甃斷紋生鮮花莫辨沿牆迹松葉時聞委砌聲
愧以不才同制作諸公此日負高名

惠山泉

此泉甘冽冠吳中舉世咸稱煮茗功
路掛山腰開鹿苑
池攢石骨閤龍宮聲搖夜雨聞幽谷
彩發朝霞眩太空
萬古長流那有盡探源疑與海相通

寄維揚賈侯

經國長才世豈多羣邪嫉正奈公何
氣蒸雲霧藏喬嶽
聲轉滄溟放大河
遠跡江湖猶棄絕
驚心歲月屢消磨
鵬鵬自有垂天翼肯逐飛鴻入網羅

寄康大夫 二首

往年持節使山南及此人情上下諳高士變心慚隱逸
小胥縮手戒貪婪猿聲散漫浮青嶂鴈影襴褕曳碧潭
遙想政成多暇日幬帷出郭有誰參

又

遙想幬帷出郭時先驅十里走旌旗青山落日蒼茫暗
白水秋風慘淡悲勁矢每隨前隊發清笳偏逐後行吹
荊州未覺風流遠縱飲還應到習池

寄喀爾公二首

廟堂爲政已優游第秉純誠贊大猷五緯連珠環北極
萬方同軌會中州衣冠肅肅趨金殿鐘鼓遲遲報玉樓
治世賢才今盛集願陳旱麓頌宗周

又

歎息流年逐逝波功名到手莫蹉跎高才自昔遭逢少
公論于今責望多梁棟器充能負荷鹽梅味合要調和
共誰魯國勲庸盛青史何年可滅磨

寄康大夫

官居烏府號清嚴
察吏由來首六廉
舊直螭頭司紀載
新加豸角備觀瞻
蒙恩聖主寧求進
具禮名流每執謙
欲論六朝興廢事
監輿應度蔣山尖

送伯長扈駕

二首

罕畢前驅盛國容
黃麾仙仗衛重重
星流曠野飛蒼鶻
日麗層霄馭赤龍
耀武邊陲須北狩
合祛天地待東封
論才孰可銘休扈
聖還宜祀岱宗

又

追從羣彥客金門獨用才高被國恩石室紬書裁帝紀
玉堂草詔代王言宦途赫赫名方振餘子紛紛氣可吞
會合適逢千載運奮飛寧羨北溟鯤

寄袁伯長

幾年簪筆侍明光直取才華補衛郎祀事悉稽周典禮
頌聲須假漢文章雲垂迥野鳴鞘遠月滿高城下漏長
校獵合祛尤盛事願聞作賦擬長楊

東湖四景爲大尹本齋王侯賦

四首

朝來千騎出城闔爲向東湖踏早春素練羃林雲氣薄
明珠穿草露華新山花獻笑開簷畔海鳥忘機戲水濱
記取當年賢太守及時爲樂與斯民

又

夏月湖中爽氣多南風疊疊捲長波漁人舟楫衝蘋藻
遊女衣裳擘芰荷膾切銀絲嘗美味腔傳金縷換新歌
使君用意仍深遠即此光華豈減磨

又

暫停麾蓋擁輕舟此日湖山屬暮秋采采黃花登几案
離離紅樹散汀洲傾壺浮蟻杯頻竭下箸鮮鱗網乍收
莫向錢唐誇往事白蘇未許擅風流

又

雲氣低藏十萬家東湖飛雪又交加玉禾舊布仙山種
瓊樹新開帝所花別浦移舟聞過鴈高樓凭檻見歸鴉
侯門似有相如客賸賦篇章與世誇

虞待制魏錄事述懷有作次韻奉和二首二公皆

故相之後二首

勢等衡廬各柱天家傳性理竝鉤玄諫垣劇切章連上
文館招延席屢前羊豕尚修松下祭麒麟肯信草間眠
岷峨舊日求遺族萬里須乘逆水船

又

理氣兼明善論天祗應爲易又爲玄玩辭已契忘言表
說卦仍觀未畫前對案窮年無近效閉門長夏且高眠
却忘京國多奇士欲向長河共買船

即事

禁城曉色清如水高下樓臺錦繡中
千樹好花連上苑百壺美酒出深宮
珍禽競集高林霧寶馬爭嘶橫岸風
人物此時俱盛極兩都絕勝漢西東

次韻伯長待制

揮鞭遠過御溝斜出院時時見暮鴉
已入玉堂同視草還趨瓊砌共觀花
獸爐香繞窓前霧蠟炬光搖帳底霞
此去天津元不隔何須八月泛靈槎

送薛玄卿歸龍虎山

金門詔下羽人歸，欲向山中採蕨薇。
琥珀懸崖松樹老，琅玕倚澗竹根稀。
高巖蓄雨星辰濕，古石懸雲逕路微。
養性可無軒冕累，遊塵元不染仙衣。

送虞貞白之辰陽

君以調官來上國，藹然聲譽動儒林。
出門遇雨泥塗滑，歸路逢霜歲月深。
楚國千年歌白雪，揚州三品貢黃金。
高才不仕朝廷上，有詔應煩使者尋。

春雨

濛濛春雨暗重城
莽若山林雲氣生
駕過東朝霑羽蓋
仗移前殿濕霓旌
蒼松密掩巖頭鶴
翠柳深藏谷口鶯
明日不愁花爛熳
新晴陌上有人行

徐獨清挽詩

大道無名識者稀
獨于元始探精微
秦關忽報青牛度
遼海寧聞白鶴歸
經秘玉函旋地軸
書懸金榜闢天扉
門人攬拾編遺事
第錄先生杜德機

寄武當山人張真人

山走西南氣勢尊大神遺迹至今存
冰橫磧下千年凍雲起巖前萬里昏
既有嚴威彰赫赫詎無厚福護元元
真人制行通天地日日飛仙降殿門

題和斯布哈同知畫像

堂堂玉立照青春昭代由來重世臣
帶納掖庭聯衛士分符江徼總編民
鸛鸛裘暖鳴鞭疾翡翠簾深翦燭頻
州縣三年姑少試驅馳休厭屬車塵

次韻田師孟西曹即事

隱吏重來右掖初
清明時節亂花舒
霧承黃閣霏霏重
雨散彤庭點點疎
李耳舊藏周典禮
蕭何元得漢圖書
經邦事業須公等
要使皇文日祭如

次韻黃子久獄中見贈

解組歸來學種園
栖遲聊復守衡門
徒憐郿塢開金穴
欲效寒溪注石尊
世故無涯方擾擾
人生如夢竟昏昏
何時再會吳江上
共泛扁舟醉瓦盆

鷗波亭阻雨

坐聽高樹響颼颼風雨相兼卒未休
氣雜昏明侵晝景色交黃赤變河流
潛移窟宅蛟龍怒固守林樊鶴鶴愁
水潦此時傷稼穡天人何事計仇讐

懷錢唐故人東應中父

幾年流滯客京師每憶江邊話別離
落魄已甘心似鐵蹉跎無奈鬢成絲
草玄思苦無人問彈鋏歌長只自悲
滿目塞雲飛去盡倚筇獨立更多時

寄吏部張尚書

復喜清朝用大賢
玉音俄對廣庭宣
姚崇已託君臣契
李泌終操將相權
此日經綸須展布
他時簡冊要流傳
淵明有待公田米
可念江湖久棄捐

題謝疊山遺墨二首

荆南失守見亡形
太歲徒聞忌丙丁
羸老扣心天藐藐
鬼神號哭夜冥冥
忠臣效死招烏合
烈婦捐生報雉經
辭氣凜然遺墨在
再三尋繹淚雙零

又

故宮愁見黍離離大厦元非一木支義士忠臣徒走死
寡妻弱子謾傷悲五經文字寧虛設一代人才頗中衰
慷慨殺身猶易事似公方可正民彝

題本齋王公畫像二首

天姿英粹異庸常早簫雲霄被寵光劍戟森嚴開武庫
珪璋特達薦明堂願承簪履趨門下竊候旌麾拜道傍
邪正此時真雜糅秦臺懸鏡亦煌煌

又

詩禮傳家德望隆一門三世拜三公
五營帶甲軍容盛九府流泉國賦充
房魏素懷尊主術龔黃先奏養民功
欲將惠澤量深淺楚浸洋洋與海通

寄題成都萬竹軒爲李仲淵作

君家種竹蜀江傍高與蠶崖勢頡頏
已樹旌旗分部曲更鳴琴瑟應宮商
蛟龍併逐波濤化虎豹曾因霧雨藏
兄弟至今俱宦達未應開筵接求羊

送范德機

往歲從君直禁林，相於道義最情深。
有愁併許詩頻和，已醉寧辭酒屢斟。
漏下秋宵何杳杳，窓開晴晝自陰陰。
當時話別雖匆遽，祇使離憂攪客心。

送鄭子謙倅蘭溪二首

主人情重賦驪駒，戶外羣騶有所須。
將喜在場登薺麥，毋忘入澤取萑蒲。
風乾鳥雀當欄噪，日下牛羊隔隴呼。
昭代擇賢先治理，服勤簡牘是良圖。

又

青絲絡馬去翩翩正是春風二月天
樂作前行尤蔚壯書隨後乘併稠
填徵符此日須官次射策他時對御筵
玉府編摩求大手知君元有筆如椽

贈彭萬里

素居鄉鄙繫瞻聽遠涉京都迓寵靈
掛席波濤秋淼淼據鞍星宿曉熒熒
肯如蛟劍終藏匣誰信牛刀始發硎
將相與人殊勢分祇應雙眼爲君青

七月十九日大明殿早朝

王氣浮空御殿開
金衣照日近臣來
絲囊已進千秋錄
黼座還稱萬壽盃
王子吹笙雙鳳下
羲娥攬轡六龍回
衢樽此日霑恩賜
散作祥風遍九垓

酬賈郎中

挺生雄俊氣昂昂
服事朝家被寵光
鸚鵡盃中春正好
鳳凰池上日偏長
新裁樂府傳宮體
舊著朝衣帶御香
忠孝兩全人所羨
只今慈母在高堂

雷江阻風寄池陽通守周南翁

繫舟江岸隱蒲蘆坐聽篙師制疾徐巨浪駕空龍出沒
猛風吹樹鳥謹呼詩題短札難頻寄酒滿長鉗已屢沽
輦道沙乾宜竝馬問君何日宦京都

送王仲儀歸婺源

學道山中歲月長中年已見髮蒼蒼爲延簪笏開松逕
因蓄詩書蓋草堂季子不期爭富貴公孫莫厭舉賢良
告歸苦值兼旬雨幾度黃流撼石梁

體覆木棉價過樂平境中偶賦

蒼山百里路盤盤遙望連峰劍戟攢斷岸回風纏古木
高崖飛雨雜奔湍石田硤确收成薄巖屋崎嶇結構難
度地何如江以北提封百萬有餘寬

點義倉即事

南來受命佐爲州喜遇豐年暫出遊過嶺崎嶇尋道路
上山硤确治田疇修藤掛樹龍蛇走怪石攢溪鴈鷺浮
賦役已寬詞訴簡素食無補謾優悠

題楊指揮樂善堂

樂善名堂事可誇
兩全忠孝故侯家
弦匏入廟思無忝
介冑升壇聽不譁
窓下唱雞書未卷
門前立馬鼓猶撾
後人自爾蒙遺德
流漲春江詎有涯

次韻張秋泉真人碧桃

道院桃開一樹春
往來勾引看花人
揮毫欲賦巫山女
振佩疑逢洛浦神
翠萼臨風搖不定
珠蕤承露綴如新
煌煌更結千年實
凡木何由竊比倫

再次韻

一枝如玉照芳春幾度凭闌欲殢人翠被夜寒愁灑淚
珠簾月冷怕傷神劉郎陌上栽仍舊王母池邊賞又新
不是梨花飄雪樹望中清絕更無倫

江上

合流渾渾古則然中有物怪藏深淵鮫人賣鮪出水底
龍女結佩遊堤邊芙蓉覆波顏色好薜荔絡石根株懸
此行欲遂極幽險所聞廬阜多神仙

過安慶城下呈李惟肅判官

山川未到已知名前代英雄幾戰爭
水受委輸開巨浸地乘走集建孤城
島夷筐篚來修貢楚俗魚鹽樂治生
四海晏然當此日斯民何幸際承平

寓長春道院春雨即事呈鄭尊師二首

南榮相距數尋間滿地春泥隔往還
夜雨暗添籬腳水曉雲濃掩樹頭
山修簞夾徑宜增植細草侵堦莫謾刪
世慮紛然無止極敢求大藥駐衰顏

又

客遊無賴阻重陰
院落蕭條徑術深
數畝林塘觀不厭
一窓風雨坐相侵
靈蚪尚有蟠泥跡
老驥寧無越塊心
多謝西家賢太守
相招樂飲費千金

題沈君湖山春曉圖詩卷

迤邐沙堤接畫橋
東風楊柳暗長條
鶯隨玉笛聲偏巧
馬受金羈氣益驕
舞榭歌臺臨道路
佛宮仙館入雲霄
西湖春色年年好
底事詩翁歎寂寥

東程處士

故人不見十年餘
鴻鴈南來得素書
茶吐槍旗迷澗谷
竹供編簡塞庭除
詎容煉藥燒金鼎
有待橫經校石渠
江上繫舟將發去
黃山回首重躊躇


贈合部遇宗師

遠俗超然百慮忘
蒲團孤坐日偏長
高城靜數蓮花漏
密室頻燒柏子香
古地神通周世外
諸天雄猛侍階旁
雜華義諦無窮盡
願見菩提發寶光

仲弘集卷六

謹案卷四第八頁後一行旺扎勒圖舊作完者都
今改 十一頁前五行喀爾舊作康里今改後
倣此

卷六第十二頁後五行和斯布哈舊作火涉不花今
改



總校官庶吉士臣張能照
校對官中書臣方維甸
謄錄舉人臣汪志伊